

摘藻堂四庫全書薈要

集部

欽定四庫全書薈要

集部

空同集卷二十四

詳校官候補通政經歷臣郭祚熾



欽定四庫全書薈要卷一萬六千九百十五

集部

空同集卷二十四

明 李夢陽 撰

五言律二

古意

內殿飛龍馬君王賜玉鞭長鳴彩仗下立在此紫騮先放
逐緣何事飄零竟不旋如蒙蔽帷顧萬里為君前

賞遊

王者化無外玉門開至今笳聞青海外馬放白登深漢
將收金鼓胡姬弄玉琴宮中花月夜那稱賞遊心

客散

尊傾客自散而我卧空林五月涼風至孤村細雨陰竹
蘿垂野逕花草澹幽襟夢醒聞遙唱依稀楚鳳吟

游兵

聞道新開口游兵未解圍只須殊死戰莫放隻輪歸漢
月已自滿林鳥常夜飛早將書插羽天子日宵衣

省中春暮

禁漏煙花北分曹御苑西
高林落日盡幽院集鴉齊
豈貴浮生趣常便靜者棲
坐憐春事晚庭草日萋萋

觀雪省中

省葉辭寒盡庭花向暮飄
黃雲變玄朔萬里入層霄
灑地紛紛密淩虛脈脈遙
北風聊可詠攜手不堪謠

聞砧

逸響緣雲起清砧入暮繁
秋風吹落月萬戶更千門
寧

知寄遠意不盡搗衣魂早晚逢西使流沙隔塞垣

旅夜

百卉已蕭索哀蛩胡未休寒天清渭樹落月故鄉樓
古人猶涕淚吾意豈公侯雖離南去鴈漂泊向何州

除架

種豆高於屋垂瓜忽滿庭根深歷夏茂蔓弱望秋零
糴雜沈霜露縱橫礙月星斧斤呼稚子欲伐幾回停

其二

炎時忻密葉寒至怨多陰自是哀榮理非關愛惡心伐
條近陽月開牖散秋禽但能存碩果無用歎蕭森

詠史

霸王雄圖並淒涼世徑分鯨鯢赴巨壑鷹隼失高雲難
折朱雲檻休嗟袁紹軍當時干帝紀一一動星文

望極

望極雲天黑關門落葉深古城饑雀啁長路斷蓬沈嫠
婦登樓思孤臣去國心此時看故壘何處不沾襟

其二

漢末忠良顯英名李杜齊伏機翻自中倒柄為誰攜碧
海鯨鯢鬪蒼林虎兕啼南州徐孺子何事獨栖栖

定居

故業秦山北新居梁苑西平生一丘壑何處竟安棲玄
豹終隨霧神龍或困泥向來登眺夢常繞杜陵溪

歸沐

歸沐謝人事脩然悲俗情陰陽爭歲色江海蓄春聲自

妻青雲懶那教白髮生君看少年者騮馬盡飛纓

春日大梁東郭

桃柳清沙晚悵然悲遠春葉明深坐鳥花劇轉愁人少
小追懽地乾坤放逐臣已看共如此何惜醉遊頻

雜興

衆木依繁塔吾亭俯蔡河側思雲驥渡不忍泰離歌窓
裏遊天地春前種薜蘿養生誠計拙冥寂保天和

登臨

屏迹良吾性逢辰每壯心
花含向日霧柳變隔年陰
行坐自芳草依棲還舊林
高樓出迴絕無日不登臨

其二

春燕不巢屋國祥徵至今
孤城四戰地斜日兩河陰
岸坼陳橋斷花開宋苑深
河船不入渭那慰望鄉心

雨後朝望

半夜雷驅雨清晨草映空
起看南仆樹知是北來風
宿霧籠初日晴天滅斷虹
劇心時序晚遮莫傳巖功

早春繁臺

泯泯春猶早行行賞不違
柳黃沙際見草色雪中歸
積水生雲氣孤城下夕暉
誰禁臺寺望北鴈又將飛

早春南郊

正月郊南路獨行吟早春
冰霜猶在眼柳色暗隨人
直道元通蔡層山故蔽秦
浪遊今短髮凝望欲沾巾

郊行

午雪融村溢春沙引騎紆
田禽忽自起水鶴會相呼
歇

馬時傍柳逢花自倒壺醉眸橫落日寂寞宋京都

時事

幸覩三春媚翻增兩鬢華賊來當白晝風起但黃沙碧
飈依牆竹紅殘拂檻花寄言寇盜者四海尚為家

被繫國境眺望

亦知塌翼鳥豈意罽羅求萬里勞明主孤臣淚暗流臨
京花更苦近苑柳偏愁愧爾雲間燕銜泥向玉樓

下吏

弘治辛酉年坐榆河驛倉糧乙丑年坐劾壽寧侯
正德戊辰年坐劾劉瑾等封事

十年三下吏此度更沾衣梁獄書難上秦庭哭未歸
圍牆花自發鎖館燕還飛況屬炎蒸積憂來不可揮

獄夜雷電暴雨

一雨暮何急孤眠宵未央疾雷翻暗壁落電轉空梁
勢急千山動光還萬里長天威終不測魑魅可潛藏

獄夜

簷景栖栖落臺居黯黯幽鼠緣爭果墜螢過隔衣流幸
竊餘光照那蠲多穴愁亦知廣川子跼蹐為春秋

南征

暑行心日煩孤馬背中原地勢吞淮泗山形包鄧樊沿
途官柳接吟葉麥秋繁赤日蒸雲夢科頭思故園

野戰

盜賊乾坤滿縱橫野戰悲隨城嚴戍鼓平地有旌旗樹
燕閒相逐垣花寂自垂諸君大河北捷報幾時知

野泊

遠電明江夜官舟野泊稀
山鐘天外落林火雨中微
水立黃龍鬬沙靄白鷺饑
平生萬里志可奈夢西歸

舟中病感

寒望舟中遠鄉心病後多
萬山通越水孤棹雜吳歌
霜已丹楓甚吾如白髮何
倦遊常藥物歸思繞關河

安仁間夜哭

縹緲因風訴哀哀何處音
聲隨落月斷聽入過雲深
轉

戰增新鬼誅求損衆心懸軍今更急寨滿碧山岑

得家書

隔歲纔通此一書真萬金時危作宦久家遠戰場深慘
慘屯黃霧紛紛走綠林怒來思擊楫時有渡江心

報生孫

強仕今為祖家書昨舉孫行藏三代具生養九朝恩長
但修蘋藻愚從喚犬豚見時應解笑先夢繞夷門

徐汭風阻雨雪

風急江船絕年殘野色凝密雲寒夜析流霰灑舟燈四
望湖天黑孤吟羈思增傍村有夫婦對火綴魚罾

其二

南雪竟為雨北風增野寒漏船喧夜語攤濕攪晨餐轉
苦人烟絕生憎鷗鷺乾吾行尚濡滯估舶爾應難

其三

阻舟江柳下信宿五湖中立水偏吞雨飛沙半逆風夜
檣扶岸集漁火亂波空信有悲懽異應知易地同

其四

常年遇泛客，煞厭說風波。雨雪空江夜，伊予悲慨多。沙人荷傘至，灘鳥掠舷過。幸及投簪會，山中有薜蘿。

徐汧阻舟七日

七日北風阻，野灘舟不行。僕奴增餓色，妻子話征情。疎霰欺簾入，流澌逐浪生。獨吟江上苦，詩罷欲三更。

湖夜泛

煙湖迴不極，搖搖中夜征。棹發魚龍動，人衝鴻鴈鳴。雪

月物意慘雨天寒色生共有舟航事誰深途路情

廬山冬至聞雷

小至匡南雨空江此夜雷仄憂羣蟄動急恐萬山摧盜賊時事苦陰陽歸思催征鴻莫遽起擬爾北同迴

雪夜廬山翫月

廬山萬古月幾度雪邊明影傍素林滅層隨寒浪生蔽巖疑有缺侵鵲暗須驚轉恐羣星妬冰壺獨自行

南康聞還山之報

傳玄非侮世陶令合辭官客路青陽逼歸心白髮寬江
城消雪送春鴈倚舟看自此茫茫去都門昨挂冠

江州雨

潯陽困李白吾寓亦江州地轉濤聲逆城空山氣流二
儀風雨積雙鬢古今愁去鳥衝烟白偏迎故國眸

霽

日霽催江色心攀作楚氓寒帷二載過歸劒五湖情霜
換湓溪葛林遷栗里鶯忍看復新月廬岳夜猿鳴

七夕宜城野泊逢立秋

漢江天上水牛女世間宵自動黿鼉影誰傳烏鵲橋孤
城古塞月一葉楚門潮君看西流火分明奪斗杓

撥悶覃園

秦客楚山北秋園古堞西野風吹萬木禾徑卧孤麕江
漢歸舟迫關河落日低可留吾便醉為愛白銅鞮

野風

山鳴野風至漢水白蕭蕭月滉魚龍醒雲蒸豺虎驕有

家驚節物不寐想前朝萬古英雄跡江城夜寂寥

早起

炳燭搖裏水開門認楚山風雲慘淡曙天地有無間露
益他鄉白秋隨老鬢還飛來何處鶻逸翮繞江關

繁臺歸集

萬里竟何事三年違此都短牆殘菊在別業古臺孤冬
日低簷塔霜風靜野蕪但看頭盡白莫恡酒重沽

繁臺歸興

臺榭歸來地江山戰後心城空猶募馬樹在只棲禽看
岳晴偏近俯河寒更深風沙日日起梁父為誰吟

正月十日赴吳莊之宴

林卧百無事出城緣底希人初正月會春已柳條歸就
日蛛垂戶開尊蜂坐衣不知農話久天地一斜暉

其二

為赴吳莊飲因成禹廟遊佳車驚草綠坐石有雲流落
日銜春嶠飢鴻集暮洲已拚頻載酒展轉問花丘

早春赴鮑相之飲

憐汝一尊酒要予千古臺年從碧草換暖向玉杯來海
日連波動江鴻帶雪迴衆賓無遽起吾醉欲徘徊

初春飲大道觀因題

日月浮生改山河此殿餘酒因儒彥至春入洞雲虛何
藥曾祛老求丹尚問書白頭風物裏爛醉是真如

宿江氏莊

黃昏水鶴叫沙頭人跡稀天清看月近野濶帶星微客

語喧莊犬風燈靜夜扉持醪忽自哂出郭每忘歸

題壁

客到惟雞黍農情愛汝真隔城因下榻曠野合留賓騎
苑沙明月鞭橋柳弄春忍能辭一醉天地漸風塵

春日余莊感舊

圃勝元因主花繁更屬晴醉重今日酒啼變隔年鶯遇
樹每共坐尋香時自行晚看風色異天地一含情

其二

名園多感激繼至轉芳菲節恨清明逼人憐故舊稀暖
煙低野淨雲日度花微莫漫愁春賞吾今已拂衣

雨過

賈誼有
旱雲賦

倚杖河城暮林園雨過清斷絲猶舞燕入葉已沾鶯無
惜聲連夜何妨坐到明旱雲吾欲賦愴惻為蒼生

雷電

丁丑年十月十
三日是日立冬

雷電交冬夜滂沱徹曉間老夫偏不寐起立迴看雲濕
重菊垂檻鳴哀鴻趨羣明朝傳太史應有紀祥文

喜雨客會

萬物今逢雨吾堂晚集賓
寒聲催電至猛力攪風頻
坐看水平席歸防泥沒輪
沾濡無自苦憫憫是農人

晴

雨好晴亦好灑然詩興新
雲分天欲斷日晃地如伸
濕入紅蕖重乾回葉篠勻
趁時樓可上萬里不風塵

曉

北斗脚下地東星明漸
高霜初被山岳霞已閃
波濤寒

鴈能羣過隣雞只亂號不眠聊自待紅日上林臯

早起莊上

為農起常早每與雞鳴期露重花偏得林深鳥自遲飛
星當面過落月向人隨玉珮金門外遙憐待漏時

莊上晚歸

萬動各有息吾亦念吾棲鴉翅昏猶接花蹊曲欲迷茅
堂煙火外稚子竹林西自笑忙何事還家每宿雞

新秋夜興

微風入枕簟林卧仰看星露氣秋元白天光霽益青草
蟲攢暗壁螢火閃疎櫺那解蕭森節都從一葉零

其二

猶記初朝歲寧知遽數秋庭梧碧自落晚蕙弱誰留門
閉人同夜心西火共流間眠亦反側霜露隔松楸

深秋獨夜

獨夕偏聞鴈悠悠寢復興林堂下微月風色暗疎燈遲
暮心難已悲涼氣轉增憂來理琴瑟腸斷舊朱繩

郊園省水

莫辨田園路聊遵水國遊物情真困雨吾道本滄洲避
濤紆尋徑逢深屢借舟草玄亭好在坐數自來鷗

其二

斬木聊供釣當流且著閑雞豚各惆悵鵝鴨爾能寬松
菊陶元亮江湖陸務觀魚之吾過矣魚鳥鏡中看

余園春日

市居常少出花日復多風萬古繁華地三杯感慨中步

畦憐小摘攀樹惜初紅
靄靄征雲外哀哀何處鴻

河上秋興

古有蘼葭客吾今水一方
茅齋寒淦淦洲渚鬱蒼蒼
獵騎捎河鴈歸人競野航
霜高木葉下莫擬是瀟湘

其二

坐送登臨目晴空鳥路長
秋雲不近苑官樹自成行
河洛來天地人煙接渺茫
采蘭空澤裏彼美在何鄉

其三

日上秋林靜江清旅思微黃葉雨後積白酒客來稀今
古三川地乾坤一布衣獨行吟望苦沙鳥背人飛

其四

名城急鼓吹野處散秋煙衆草莽零落孤松羞自妍山
川亂明水雲日媚高天何事楊朱子臨岐獨泣然

其五

後代看今代今人即古人空傳歌舞地不見綺羅春宋
嶽饒寒草梁臺起暮塵蒼茫白鷺渚瀟灑類閒身

其六

白馬瓠子口秋風汾上歌帝鄉不可見千載白雲多樹
動江帆至雲流塞鴈過滄洲無盡極慷慨有漁蓑

其七

十載宋梁間雞鳴望四關月來天似水雲起樹為山朝
市今何處流波去不還高秋未歸客腸斷濁涇灣

其八

一為梁地客怨及授衣天野靜寒煙白沙鳴暮雨懸飛

龍過絕浦立馬看長川望望頻花盡鷗行若箇邊

其九

積雨催搖落江村菊自秋驚風振大壑失鴈下寒流暗
水斜穿竹孤雲晚抱樓虞卿足簡帙白首傲公侯

其十

不寐傷寒節孤吟遶菊行月沈李家浦雨入宋王城颺
沓楊柳落斷續寒蛩鳴泛泛中河艇誰知此夜情

閒居寡營忽憶關塞之遊遂成七首

牢落居庸道蒼茫六載還開軒延漢使對酒話燕山鳥
道增新戍天梯護上關白城煙火切鎖鑰未應閑

其二

西崦千家落防秋五百兵山長元入塞澗曲故穿營靜
夜聞熊鬪黃昏報虎行昔時快歷覽三駐白洋城

其三

沙嶺為黃
華東路

沙嶺長園入羊腸宛宛斜石危偏駭馬草動數驚蛇古
樹魚今樹巖花雜澗花向來行塞日親見五陵霞

其四

是為西路

往年趨北路今繞泰陵西
晝黑垂蘿密山青禁木齊
獨僧攀杪出怪鳥趨陰啼
寂寞黃華堞遙臨古塞溪

其五

黃華牙將張

孤蓬絕塞口匹馬戍城前
跨迴煙墩直緣危石棧連飛
雲下獨石逝水入潮川
舊對張軍帥題詩醉菊天

其六

銀山湯嶺北鐵壁斗門邊
虎守千年寺人看一線天
赤

厓崩古塔陰洞圻新泉尚記漁樵侶長歌過馬前

其七

弘治辛酉二月之望宿
銀山寺觀鄧隱峰詩刻

春遊臨絕嶠月出卧空岑暫逐山中客常關物外心三
峰藏淨宇百里羨雲林崖際劉高隱何時一重尋

夏夜

閣幔霑初霽雲姿淡夕扃涼蟾輝遠樹昏塹下流螢久
靜通幽理沈思損性靈昔人渾未達白首著玄經

寄書

驛使殘年發家書向夜封當衢慙驀裹涉水憶芙蓉紙
短情難盡鄉遙恨易重孤燈遲明發寒月下疎鐘

春宴

白首間歌異豪心遇酒多酒當花潑灩歌與燕婆娑暝
色侵臺殿春風換綺羅未須愁薄暮吾借魯陽戈

熊子河西使回三首

是時甘軍殺
都御史許銘

偶遇西河使真傳塞上情一春常凍雪千里半荒城永
斷匈奴臂猶勤哈密征重聞帳下變無語對沾纓

其二

絕塞田誰廢甘州稻舊畦荒屯惟見兔破屋不聞雞磧
石烽煙北祁連戰鼓西平生邊務意一一願封題

其三

舊說窮源使人今出武威葡萄應啖足沙棗故攜歸燧
火真樵面胡塵尚黯衣問君春塞鴈曾過玉門飛

汴城東樓夏登

身世吾垂老中原北上樓陰陽真去鳥天地本虛舟王

屋千峰伏黃河一線流晴沙暮浩浩羨爾自行鷗

其二

危樓六月上樽酒四天開俯看嵩雲動涼疑海雪來
光杯裏見島影檻邊迴不見芒碭氣空深弔古哀

田園雨蕪客過三首

車馬人來地田園雨後心顏垣疎柳卧漏屋野花侵稼
穡悲生事琴樽伴苦吟自無農圃學不敢怨商霖

其二

地下經年雨田乾滿目蒿繞籬荒苦竹小架刺葡萄閒
寂人還至壺觴興並高草途煙欲暝猶遣貫村醪

其三

廢塢懽能勝羣遊百任為持竿探乳雀擲石打黃鸝落
果呼兒拾逢花折自隨黃昏休擬駕郊月已曾期

大道觀會飲

敞閣元無暑清林更著煙人觴金像側馬繫石門前壁
草侵衣冷壇花落酒鮮丹青半磨滅何處問諸天

其二

殿閣生秋早壺觴散客遲蟬吟松露下鶴入島雲隨塵
世人堪醉蓬萊路竟疑羨門如可作願與跨青鷺

其三

與客寒瑤草開筵傍洞花盤堆白石髓觴瀉赤城霞靜
悟陰陽轉衰從髮鬢華看君有仙骨倘許授丹砂

人折牡丹見贈賦之

俗眼開爭折花心抱自知色新魚露至香在有蜂隨老

病傷春日乾坤倚杖時落紅紛紛點點忍把出羣枝

客至

宛宛酒船至依依小隊過亭於草玄近溪比浣花多繫
馬穿芳樹持杯向碧蘿更謀泉上飲無遽促鳴珂

其二

訪隱春行早衝風野興豪鹿銜初出草鶯坐半開桃一
叟煙霞僻羣公位望高浚郊元此地今日又干旄

東園偶題

孤亭萬木裏獨坐一花飛老更知春色閒能到夕暉微
風偏媚蔓返照故熏衣隔院香逾好呼兒莫掩扉

南莊塘水淥漫補治小舟乘興泛遠數迴

久懷浮海意偶觸濟川心一艇方塘繞杳然春水深桃
花能泛泛雲日故陰陰還艤綠楊下翻憎黃鳥音

月槐之下與程生談亦念其夏游自去歲

月出槐初定風微影尚搖念離仍是夏拚坐忽分宵星
斗來天近塵沙去路遙別情魚望雨白首夜頻翹

其二

早時偏苦熱沙國每愁風
今夕客談處孤槐清月中
露凝天故白榴近夜能紅
明發衝南暑逾江莫更東

秋雨夜起

簷雨響不絕披衣中夜興
寒聲壓高閣濕氣逼疎燈
一鴈叫何處數蛩吟可憎
誰能奮長劒割破黑雲層

聞鴈

慘澹胡風起連鳴上碧霄
纔聞秋浦外已復夕山遙
哀

故欺霜角清應斷夜簫南樓有思婦夢恰到西遼

喜雪

老健衰能著寒吟雪故行袖承花數出履蹴霰求聲飄
即諸山壓填應四海平久知三白貴吾已十年耕數上聲

嘲雪

怪爾梁園樹先春忽自花態多低復起形弱直還斜祇
解光迷鶴無能色變鴉玉樓銀闕裏汝敢鬪瑤華

雪晴

餘雪且休騁
高空微欲曛
盈盈看玉樹
澹澹入黃雲
奮激鵬連起
啁啾雀自羣
巖風暮益發
天隙認星文

暑夜

微月通簾閣
疎星下檻塘
樹陰交進濕
水氣暗生涼
歲月一陰長
乾坤雙鬢蒼
北窓聊復爾
敢謂上羲皇

空同集卷二十四

欽定四庫全書薈要卷一萬六千九百十六

集部

空同集卷二十五

明 李夢陽 撰

五言律三

酬京師友人見寄作

浮雲悲故國積水起鳴雷
不見長安日愁登古吹臺
故人三月別天上一書來
欲問經行處山中杜若開

繁臺餞客二首

異地同為客看花更屬秋雲連去國目鴈引望鄉愁隴
樹迷關道吳山蔽驛樓忍將宋玉恨還共李膺舟

其二

萬里遊燕客十年歸此臺只今秋色裏忍為菊花來霜
露凝秦望衣冠餞楚材不堪分袂苦落日一鴻哀

送秦子

梁國秋砧滿范陽風葉稀如何故人去不與鴈同飛北
路薊門古寒天易水微君行莫怨霧霜日指南輝

聞李公寓郊園寄贈

幾日棲東嶼昔林今若何
主人能醉客世事且狂歌
黃鳥晴吟竹紅蕖晚出波
自憐門士未眠病阻鳴珂

答伊陽殷明府見寄

古縣垂新柳獨吟酬好春
琴清山在眼花碧酒隨人
奈此河陽少曾於漢署親
郵筒定不惜有句念沈淪

寄殷明府

自枉去年札約為嵩少行
夢常飛洛水詩屢到伊城
蘿

殿王喬鳥花臺子晉笙君行奮雙翮吾此學長生

其二

可怪伊陽尹冬來不寄詩徒懷白雪調況逼暮雲時日
落山城黑風鳴邑樹悲身危屬撫字為爾一淒其

送鮑生下第南歸

只期橫直上豈料戢鱗歸抱玉終難掩投珠安所稀秋
風吹獨馬落日照征衣南到江亭上還瞻北鴈飛

杭刑部淮談其師齋

國難逢驕虜時危惜俊才
鹽車在泥淖驥驥亦悲哀
片月清秋照商風一夜來
思君不相見惆悵對西臺

南陽宅訪徐禎卿

東閣能留第南人暫亦居
琴書遷卧內騎馬到堂除
殘樹喧巢鵲微風走壁魚
追思秉釣日冠蓋爛盈閭

張子抱疴避喧山寺濶別旬月作此懷寄

楚楚張公子悲吟度歲華
棄官臨野寺服習向山家
石髓遇不識黃精春始花
洞中日月秘強食勝丹砂

寄錢水部榮

雪時揮袂別見雪即懷君河館冬難暮沙洲晚更雲清
為蒼水使靜對白鷗羣昨夜尋君夢微茫路不分

風夕東徐子

嚴冬萬卉寂朔吹迴添愁嶺日微含照川雲半逆流頻
齋忘肉味乍冷覓羔裘差勝山陰夜能孤訪戴遊

送舍姪木還汴

天涯逼除夕念爾獨歸人夜宿盧溝雪朝逢易水春為

駒先汗血藏劒莫愁身到及張燈候遙知戲彩頻

得何子過湖南消息

及遇荆門信洞庭秋已淒湘江饒苦竹幾聽鷓鴣啼馬
援留銅柱王褒祀碧雞向南衝瘴癘藥物去曾攜

憶何子

其兄時為
巴陵知縣

憶爾辭京日余歌萬里行經秋無過鴈索處若為情去
已窮滇海歸應滯岳城鳳凰池上草春到為誰生

何子至自滇

醉折荷花別寧期花復開川原一回首雲日共徘徊知
向百蠻去云從三峽來進舟雖一賦胡棄楚陽臺

春歸東謝員外

寂寂鳴禽變陰陰弱絮飛煙花從客久風雨會春歸且
盡追隨飲休傷節序違無端臨暮景翻憶謝玄暉

晚過序上人

塔日微微墮禪居隱隱涼軒開惟有竹坐定始聞香萬
古風塵地三生水月鄉頻來尋白社不為禮空王

再過序公月夜

歲已殘冬逼月餘今夜圓光侵僧磬發清仿佛樓懸鳴
鳥疑深樹高雲靜暮天夙心如解此更欲問何禪

晚過定上人

中秋鏡閣臨向晚過西林月自湖間動鵲翻祇樹深靜
宜鐘磬發寒更塔廊陰萬物輝今夕悠悠塵外心

秋雨訪李鍊師

便靜尋丹侶飛梁度赤城洞花含雨落階鶴下松迎雲

霧生仙袂秋寒咽鳳笙
余情會浩蕩先品步虛聲

送鮑光雄南歸

世事風波遠悠悠素髮新
乾坤萬里色江海獨歸人
岸柳牽行舫汀花照暮春
山中采芳杜好薦北堂親

田生間余浩然訪於東郭花下酒集

花林吾自酌見覓爾情親
轉覺花饒笑翻驚蝶趁人
百年秦地客萬里宋宮春
酒罷烟城暮無言對愴神

其二

令兄真國士吾子更超然同住孤城裏相邀東郭前攀
桃映落日折柳向春天更有梁臺約風塵入暮烟

余氏園莊

無端二月至不分百花開林坐斜陽入郊暄沙色來穠
葩偏近牖弱柳故臨杯共是天涯客無辭酩酊迴

其二

百年吾不醉一歲幾何春況接桃花暮難禁柳色新君
為避世客余是放歌人爛漫題詩徧林鶯莫漫嗔

庚午十月余氏東莊

南客招延屢東遊野興高乾坤侵肅殺雲木半蕭騷暖
澤喧饑雀冬林秀晚桃時清還浪跡痛飲笑吾曹

送人還關中

見君驅去馬忽起望鄉思華嶽寒逾峻涇河繞自遲躬
耕為谷口把釣憶皇陂何日一尊酒南山對不移

寄贈內弟玉園居

城市憐余獨鄉居見爾稀年華仍雪樹疾病有柴扉烟

起浦欲暝沙寒鴻自飢一身固不保萬事莫嗔違

毒熱在獄呈陳運使數暨潘給事中希曾

此地饒炎熱南中恐未然有風翻助暑揮汗欲成泉
鳥避棲深葉蠅喧集滿筵百憂吾共汝流涕北風篇

延慶觀訪陳州王君

珠閣晴逾麗仙林午自和我來驅獨馬笑爾弱雙鵝
臘雪融樓薄溪風傍竹多雖非宛丘習吾醉亦婆娑

徙泰公方丈秋夜

秋林風色暮游子念征衣鴻鴈俱高起江山獨未歸月
臨蓮室靜螢傍竹林微喜對離羣友吾生本息機

康狀元話武功山水

夢寐關中好連年未得歸側聞武功勝嘉興益翻飛水
繞褒斜出山從蓋屋圍因君覓水竹為買釣魚磯

發京呂狀元送出城

旭日清霜麗關河獨鴈飛征蓬各自遠會面後應稀渭
水縈秦塞南山繞漢畿料君鄉思切只恐未能歸

答何子問訊三首

伊汝投簪日憐余冒網羅江湖鴻鴈絕道路虎狼多萬
死還鄉井潛身葺薜蘿天涯歲仍晚無路覓羊何

其二

仲夏辭梁地中秋出夏臺醉行燕市月留滯菊花杯日
暮千行淚天寒一鴈來亦知張季子不為食鱸迴

其三

弱冠真憐汝投閑更可哀山高桐柏觀水曲范滂臺假

寐憑巖桂潛行倚岸梅此時誰借問日短暮寒催

阻雨明港寄何子二首

白日雲猶動青山雨忽來計程今夜會策馬出村回月
對荆門上天從夢澤開旅燈依港宿吟苦獨徘徊

其二

微微山日舒彼美碧山隅信宿猶難遣經年祗重吁花
含明日艷月助此宵孤久擬申城醉香醪語爾沽

賢隱寺集贈

水落移舟穩山行酒暫隨寺高垂路細林密見僧遲樓閣登臨日江淮獨去時不應聊駐此愈重白雲思

贈鍾子漢上

君為薇省使幾度紫薇開髮以憂時白舟巡累月回漢川驚會面江雨助停杯已約同船下安能曉霽來

獨對亭贈人過訪

孤亭瞰巨壑五老對銜巵日出峰烟起風涼谷樹悲石泉秋聽急山路晚歸遲異日東南賞應深廬嶽思

發貴溪高子輩舟送一

旌旗飛近邑鼓吹送前舟
禮餞諸生侍英寮並節遊
長風驅暝色密霰響寒洲
見月帆猶進山陰恨子猷

寄贈林都御史二首

錦水啼鶯起巴山春望微
干戈滿眼急江漢一舟歸
花送琴書色霜留斧鉞威
所傷豺虎亂公也息鷗機

其二

諸葛能安蜀穰苴本善兵
向來優起詔翻作急流行
老

益丹心壯憂惟白髮驚
祗憐川父老涕泣挽歸旌

贈何君辭官歸里

三年牧夷郡萬里竟歸舟
瘴離程番雨雪乘江漢
流琴書頓縣邑五馬向山樓
棠樹苗民種清陰應舊州

新喻遇薛子送贈二首

故舊日益遠寸心奚所安
雨留杯酒暫明發楚途漫炎
暑百蠻盡風霜五月寒
知君近南斗時倚鐔鋤看

其二

解劍別此水憐君向桂林徒持一杯酒其奈故人心瘴
癘秋行霽沅湘馬度深衡陽雖更遠莫遣鴈書沈

立春寄楊君京口

一水相望隔飄飄楚越身北風猶送雨南國暗增春雲
入金山接波添彭澤新妙高峰上酒對酌是何辰

顧子謫全州贈二首

楚城悲遠望君去更悠悠十月逢南鴈章江況北流寒
沙帶宿莽霜日下孤舟明發湘東路應添弔屈愁

其二

蒼梧遺舜跡白雲秋氣愁君得人文地相傳是此州山
連夜郎密瘴入桂林收獨有思親淚非緣逐客流

與樾堂子晚步四首

有伴沙行穩無雲楚望深江湖席下出樓觀鳥邊陰共
繫南來跡孤帆北逝心徘徊忽復晚朗月散松林

其二

晚俯林烟靜居然盡一城江圍三面白雨過四時清沙

廣偏升月花疎轉喚鶯可言南岫矮青概斗牛平

其三

北郭浮沙暝西山擁坐真日猶銜殿閣江已下星辰禹
服苗風雜豐郊劒氣伸獨嗟征艦日歌吹滿城闔

其四

美樹沙能秀高花夏不疎江山百戰後登眺兩人初楚
月垂鮫淚燕山蒞鴈書異時羊續壁喜接豫章魚

九日楚山太華君同登

不入襄陽府秋山每自來那知楚峰上還共菊花杯帽
落層雲迴風生萬壑開却思羊叔子峴首獨悲哀

送鄭生南歸二首

梁園杯酒罷江上泛舟歸白日孤帆隱青天一鳥飛路
分和靖宅潮接子陵磯羨爾隨玄豹還山戲彩衣

其二

挂席南風便烟霞北望深逢人著皂帽采藥鍊黃金五
月三江路扁舟四海心方山有叢桂誰與結雲林

繁臺書院同邊子三首

壺觴聊首夏文史更孤臺地主更來幾登臨每復陪徑
蘭迎節秀巖鵠撲驄迴落日凭軒外蒼蒼四嶽開

其二

駐賞林紅減登吟野綠圍故人率爾遇時序暗中違氣
突芒碭斷雲低孟澤飛昔賢誰復此無羨酒酣歸

其三

興劇攀巍坐脩然俯日斜亭扶盤石樹崖綴殿春花薜

服賓游憶青衿閃鈞槎綢繆不欲別風野暮鳴笳

臺館訪李秀才漁

李生梁國彥少小事沈冥春日古臺上獨行楓樹青花
侵映雪壁鳥下草玄亭野濶看無際浮雲似洞庭

寄許監察二首

為問乘驄使經春北未迴句刪淇竹寫尊泛鄴花開昏
曉行山外風雲每自來不知銅雀上臨望幾徘徊

其二

初擬周三晉何時已百泉吏人跳水外驄馬白楊邊坐
憶孫登嘯行吟衛女篇倒看峰不極炎日有霜烟

東黃子二首

約隱情非飾今歸悔即遲田園荒欲盡親友半相疑杯
酒惟黃子儒門是白眉可能東郭柳日往聽黃鸝

其二

徑菊陶能得田瓜邵獨勤為農消日月倚杖看風雲插
柳俄成樹籠鵝忽一羣不須憂萬事客至且醺醺

許君話遊感舊四首

幾日離泉上，泉香滿繡衣。
坐談觀水事，想見采菱歸。
石柱新留姓，山藜亦借威。
知君薄朱紱，興在白雲飛。

其二

泉館舊曾到，跳珠今若何。
數年魚不小，題壁客應多。
照日輸金浪，回風散錦渦。
君令樹菡萏，勿逼古龍窩。

其三

亭榭逢君復，原泉改色流。
噴珠連地涌，仰鏡合天浮。
掇

蛤曾魚石移家欲狎鷗獵心萌自鄙日往水邊頭

其四

昔訪仙潭鯉春陰阻獨行至今看絕頂長日有雲生爾
昨褰帷過同深把釣情何時掣金鬚攜手萬峰晴

酬唐禮部見寄二首

僕疎鹵蕪鄙人也舉世棄焉於唐無一面之雅迺
今辱拔羣之顧偉文法筆吐露悃悞僕奚以有此
哉

萬事中年懶諸人近日疎不忘惟墨客願見有音書倚
伏休詢鵬生涯且釣魚問奇終缺酒不是草玄居

其二

蹈虎看賢達攀龍幾奮飛長歌百年內慘淡萬情歸種
竹從過檻栽桑不慮衣神交古有在莫遣北鴻稀

贈張工部汴上

天意焚宮殿臣心急棟梁未花辭魏闕酷暑向咸陽遇
我真傾蓋憂時每罷觴塵沙一萬里分手向垂楊

答許監察百泉和章魚泄所懷三首

疎迂甘病足天地合藏身未即辭城市何緣謝世人恨
無山在眼願與鹿為鄰暑日情真倍蕭蕭水石濱

其二

吾門客不到永晝雀堪羅竹色間中拂池涼颭芰荷片
雲感日卷雙燕掠虫過忽憶臺端使詩成只自哦

其三

睡起看雲坐敲門報吏來受書驚鯉躍投李得瓊迴思

為源泉賦辭遵比興裁不須共林石三復野情開

和許監察間報之作

忽爾西邊信飛傳過洛陽幾箇齊豕突何將最鷹揚殺
氣黃河接烽烟紫塞長籌兵有諫疏早晚達明光

送張監察還朝

北極星辰入山河斧鉞歸鳥爭車驚疾雨逆蓋雲飛御
柳元搖珮臺花且襲衣聖心虛采納忍使諫書稀

伏日許君館亭晚酌

暑閣寒風暮林亭透日疎俯池閒白羽把酒躍金魚興
觸山花發心同水葉舒孰言臺務劇鎮日有琴書

其二

樹色寒文簾池光隱玉壺敞筵真不暑愛客忽忘晡烏
返爭棲拍魚懼自戲蒲回思闌闌子天地一洪鑪

送陳左使赴貴州

萬里洞庭西秋風入五溪瘴天開斧鉞山驛斷虹蜺水
出牂牁繞城臨井宿低堂閒花樹紫簫鼓閱雕題

其二

郡縣收殊俗封疆託此臣去披炎嶺霧坐使瘴花春
獠部知徭賦夷官學縉紳誰期召伯樹蔽芾五溪濱

早秋監察許君見過

五柳驄偏繫三山雨乍過夏蟬猶咽竹夕露欲傾荷
春此青雲客懷余白石歌相看恨易晚燈火發烟蘿

寄王贛榆

自汝謫東縣朝朝看海頭書纔一紙到別已十年周日

就晚潮落城浮淮水流知君負楚調激烈向清秋

寄李濂魚呈何子

仲言何遜字

識汝塵埃際飛騰步步高許身元稷契努力更風騷暫
亦遊香署終能奪錦袍仲言應過數萬里兩鴻毛

寄王生

重九書新寄他時意獨傷故山吾別久籬菊晚誰芳日
月徒鴻鴈乾坤尚虎狼松揪圍幾大人發淚千行

酬寄徐子秋日登鏡光閣見憶

歲晚湖間閣秋臨共爾曹路疑銀漢上身近紫宸高霜
色諸天鏡窓風四海濤別離誰復此檻望獨揮毫

贈孟明府自桂林量移汶上

少年東邑宰萬里北還人桂已他時苦花須滿眼春偶
逢思宿昔臨別見交親莫小牛刀試元為驄馬臣

寄王子蘇州三首

獨立望南天秋空月會圓此時一樽酒憶爾隔嬋娟並
馬遊燕日孤舟去越年斷腸今萬里心折暮江前

其二

三十烏臺使投冠竟黑頭
田園是故里江海有新舟
把酒看鴻舉開窓面虎丘
不須慨今古吾伴鹿麋遊

其三

舊交多鬼錄吾子獨仙鄉
幸自饒強健何心說廟廊
稻輸吳郡白橘足洞庭黃
飽飯教兒女攤書日滿牀

寄孟縣張明府

同年多出宰獨爾得河陽
背郭圍王屋開門對北邙
詞

章前令掩桃李舊花香何日乘雲起雙鳬入帝鄉

酬徐子春日登樓見寄

三月垂楊合風花滿帝州伊予直北望爾上幾層樓紫
塞連天起黃河抱地流春烟動萬里何處覓前遊

送許監察還朝二首

杯酒豈無友知音誰復多君今萬里去吾奈好春何路
草隨輶碧山鶯近驛歌尚思文讌地驄馬月中過

其二

吾園花爛漫子特駐驄看偶念明朝別先違兩地歡勝
之元執斧陶氏合投冠去住情俱得離杯莫放乾


再贈許君

綠岸百花開樓船三月迴人依鐵甕望鳥避柏烏來禮
樂還朝疏山川畫笏才太微遙已入新彩近三台

畫笏
虞允

也文

空同集卷二十五



總校官庶吉士臣侍朝

校對官編修臣閔惇大

膳錄監生臣吳錫綵

欽定四庫全書薈要

集部

空同集卷二十六

七



欽定四庫全書薈要卷一萬六千九百十七

其部

空同集卷二十六

明 李夢陽 撰

五言律四

邊君生日來訪時近中秋不虞雷電

怪爾生辰日高軒特過吾秋驚飛電至雨逐去雲無上
壽須君子同聲愧老夫勞問隱顯乘月有清壺

其二

電過天仍雨庭空晚復雷連牀慨往昔阻馬得徘徊暗
藥香賓席秋燈焰壽杯非君有家慶肯放夜輶迴

繁臺院閣餞沈子之雲南并懷劉子

斗酒重陽後危樓萬里前停雲忽蔽地起鶴故橫天斜
日留傾盖疎花影別筵忍看驄馬使遙向碧雞邊

其二

豈料吾劉沈提刑繼入滇經過此臺上共醉菊花筵日
落杯光動樓空海色連無論即萬里身世轉蓬前

送姪木甥嘉會試

二子趨南省同車向北燕苦心衝鴈雪得意佇花天合
浦珠光會豐城寶氣連諒懷鵬舉志吐膽鳳樓前

繁臺冬餞翟子三首

野館逢君日相逢復惜違暖崖花尚發冬樹果初肥
斧鉞從天至家山傍海歸懸知稱慶處不獨錦為衣

其二

邦君崇大禮星使返三台路指東方入尊留南郭開館

深松自靜筵暮月還來明日山河異無言不醉迴

其三

為慕梁臺勝紆君駐馬觀風霜當夜急樓閣近星寒
酌猶更燭徘徊數倚闌知君有家國忍向北雲看

丙子生日答內弟璣

今夜今年聚誰知骨肉稀汝猶悲燎粥予豈忘于飛對
火霜威入侵杯月色微斗斜燈更續不是醉無歸

雪後寺集夜別王子

僧夜晴遊地月高鐘磬聞塔光斜照雪香氣上蒸雲客
向杯前聚途於醉後分別離誰不爾繾綣獨斯文

早春懷上方寺

此寺城中僻邊城野四圍青天直塔上落日稱僧歸殿
古松風入臺春草雪微覓碑吾不懶所慮鳥驚飛

春日過李氏因贈

偶憶孩童日能禁老大悲向來門巷接長是酒筵隨禮
樂儒門舊風花世路疑不須辭夜飲春月正逶迤

送鄭生

河冰未盡脫怪爾駕舟還
言向金陵去春登江上山
綠波元楚徼芳草自吳關
寶劍男兒在那憂行路艱

東張含

戰國侯嬴里梁園李白杯
夏驕惟溽雨秋弱尚鳴雷
病館經旬滯歸旌萬里催
別書期早寄莫俟北鴻迴

憩長葛端壁寺偶遇使人王卿齋
監察毛君詩
劄到因頓中口占馳寄亦答遊山之約

遠為長葛憩，忽接許昌吟。不覩暮雲句，那知春別心。早
花連潁岸，晚日下嵩岑。咫尺盟難踐，何須問古今。

月夜東張含

風餐涼雨過，露坐晚林幽。汝對梁園月，孰如金齒秋。常
星皆北拱，滇海獨西流。萬里清光再，應懷今夜遊。

送張含

明發車南指，滇城更復南。秋驚洞庭葉，雪壓貴州嵐。念
汝此行遠，求官今尚淹。保昌山塢側，好結望京菴。

秋日讀王子赴江西時諸曹贈行篇什感賦

接攬西江轡同懷振鐸年匡廬並突兀鄱水日悠然子
進薇花省予歸蓮葉船梁園邂逅地把酒對秋天

繁臺送張內史侍母還蜀同毛袁監察

幸值高秋霽何愁蜀道難顧瞻知國念跋涉為親歡露
菊沿江熟風林過棧寒故園如有夢應在五雲端

其二

翰苑飛名久梁園接席初文談白日下涼露碧林疎劒

閣天真險巴山錦不如饌親知盡樂日日有姜魚

其三

飲暮不歸去繁臺秋正深侍臣軒偶遇驄馬酒同臨去
國三川路停雲萬里心西南鴈不到吾遲尺魚音

丁丑重九繁臺酒集

高會今秋始重陽逐歲同上臺寒日午開閣古林風且
酌黃花醉休嗟白髮翁舊游不須問天際有飛鴻

寄王憲使

反側須開縣安危亦仗兵饒山夾岸密鄱水向秋清部
使輕裘入餘黎裹飯迎怪來服從易為懼靖南名

其二

傳爾提刑地思予攬轡游湖山不改秀蛇虎向來憂賣
劍元能事褰帷啗此州范公芳未泯亭在北山頭

寄崔內史病還鄴

漳浦新歸客文園舊病身乾坤金馬外杖屨碧山春書
合虞卿著耕非桀溺倫漢庭文賦筆誰及茂陵臣

早春宴黃宅

岐路風花裏乾坤醉眼中事隨年共異春與昔還同相
聚今何夕相看各已翁夜和杯更暖休負燭花紅

送右轄王子逼除赴嵩山之役以獄事

遽有嵩山役恰然逢此春旌旗拂袖入車馬駐蘿新坐
愛溪花發行憐寨獸馴時雷蘇萬物君重係累民

送佘生南監

江門柳色暗四月浪花高爾抱魚龍志休隨雀燕曹金

山入紫氣壁水動青袍倘慮音書隔南風有順毛

繁臺秋餞何子

曾少憐君暫臺孤引望頻清秋屬過鴈落日有征人華
嶽元通洛黃河不棄秦異時愁獨上千里見嶙峋

其二

候吏催遲暮遊人怨解攜十年內供奉萬里竟關西地
古饒文物時平罷鼓聲巡行有佳興應徧絕崖題

再餞何子

武場重布席文士此分襟
人世東西路秋天旦暮陰
杯光搖弱草庭色下饑禽
他日關中使無忘汴上音

喜李生自京師歸

北極星齊入中原爾獨歸
田園自松菊身世有庭闈
魚可一錢買花常四季飛
感時臺莫上恐濕賈生衣

送柳儀賓進聖節表

萬國生辰表天王北狩時
雞鳴元紫禁虎拜亦丹墀
漢樹霜楓古堯寞露莢移
無辭醉宮酒當是舊朝儀

中秋別鄭生

別離誰獨免此別是中秋爾上袁宏艇予登庾亮樓羽
衣飄北檻漁笛起中流炯炯共明月那堪兩地愁

己卯元日内弟璣見過二首

内弟元朝過柴門午一開柏尊吾足辦椒頌爾須裁天
地冰霜變江湖日月催鬢毛斑欲甚誰忍復春來

其二

汝今年四十而我八年多世路憐書劍生涯笑薜蘿遊

將花並放醉擬鳥同歌莫問朝元日傷心是玉珂

送戴氏

兩河飛雨盡萬里不塵沙白馬朝天客春風御柳花聲
名新上計袍笏舊傳家諒有蘭臺擢應難捨伏伽

寄毛監察

江漢歸鴻鴈乾坤罷虎狼薜蘿吾故土驄馬爾何鄉岸
樹霜先赤籬花晚自黃向來杯酒地臺柏但蒼蒼

雪中鄭生見訪

萬戶風花起吾門爾一開驚看破履跡笑指白鬚來驢
為登橋熟船非訪戴迴今朝梁苑賦合試賈生才

雪中蘇生以詩見過

楚楚眉山喬儒林美白眉竭來白雪裏惠我陽春詞結
綬終相慶投珠莫自悲長安馬蹄疾是爾看花時

春初大道觀訪蘇生

草生壇雪盡宛宛孤雲輝怪爾黃庭罷雙鵝不換歸牕
鐙留夕照攔竹伴春暉安得頻過此談玄兩不違

寄陳浚

借問垂雙翅何時奮一飛黃金不易就黑髮漸應稀
山雪騎驢出江風捲釣歸所嗟冠蓋地獨爾薜蘿衣

贈僧懷讓越人也嗜酒其居有借樹軒

訪舊來東社焚香對病禪素琴真與寂濁酒反通玄
隣樹當經牖春花落講筵不逢支遁語誰解越中傳

逢郊王子

相思汝水月相見帝城春紫邏雲煙迴青門柳色新
豈

如題鳳侶疑是好鵝賓醉即揮鞭別金龜報主人

徐子過別因而留宿

豈是陳蕃榻能淹孺子棲無言向春月難寐及晨雞
鉤幔回牕色梳頭過鳥啼如何艷陽節與爾惜分攜

洪法寺遇鄉僧

爛漫春遊處重來冬日淒風松猶故壑露葉已新蹊
廢井浮陽出魏阡凍霧棲逢僧話鄉曲寒望轉萋迷

送張生還金齒

萬里來何事三年此復過
高秋鴻鴈下落木洞庭波
歲月長途老風雲後進多
百蠻家更遠自愛莫蹉跎

其二

大雅流重譯殊方挺上才
批鱗書幾上塌翅首頻回
白髮南荒路秋風北宋臺
三杯邂逅地為爾一徘徊

送鄭淳入閩

江海發春濤南浮二月舠
花行浙口盛雲近武夷高
土布離鄉貴杉雞詫客號
延平津倘過珍閩匣中刀

送王左史入覲

帝里花應待王筵醴暫違
舟從春水上人是錦衣歸
日月瞻新袞風雲壯舊畿
辭朝君即返莫賦北山薇

送姪竹赴京聽除

皇王寶厯開汝上黃金臺
氣色三光正人心萬國來
拜除將檄入辭謝袖香迴
幸會風雲路行伸腰裒才

送長垣尹赴召二首

君赴蘭臺召誰看此縣花
久知驄是馬當許鷺隨車
日

月新明主乾坤舊一家異時鱣帛賞應首及孫伽

其二

要地徵名尹新朝急俊臣班升玉笋曉臺散紫蘭春萬
水元趨海羣星自拱辰誰言大河上白首有垂綸

寄熊御史塞上

漢官持斧處天險惜離羣塞口孤城斷峰腰細澗分胡
天秋更慘殺氣暮還雲定有憂邊計緘馳達聖君

秋日王子臺上

暑霽名王會臺成上客過清秋疎草木落日上笙歌天
地銜杯盡風雲傍檻多聖明今御極誰復慮干戈

酬錢子錫山之招

南遷公約我北望我懷公陽羨春芽秀荆溪早稻紅乘
槎伍胥口采藥洞庭東何日酬吾志江濤日夜風

送王子如淞江

寶劒寒無色蒼然海上行異書探戰伐高論動公卿何
日為毛遂前身是賈生誰憐同學子章句獨虛名

晚過孟氏雷雨遽至會王子亦來

王褒真畏友孟浩復多才下馬雲徐暮開尊雨驟來疾
雷當戶落驚電觸簷迴坐待明星出無疑曉漏催

其二

霽月出還沒驕雷東復西千門螢火動六月候蟲啼共
是天涯客能忘雨後題吾詩催仗汝好放片雲低

僧園秋集同田生

榴竹晴相媚秋光滿給孤微風捎果重殘暑入林無寶

塔金杯映青天白鶴呼不須談浩劫吾醉亦忘吾

其二

自笑紅顏日僧今白首看秋風修竹過臺殿碧梧殘鐘
磬昏仍起壺觴醉不乾塔層思盡上恐逼斗牛寒

春日宴山泉王子之第同左田二子

入殿笙簫合開筵錦繡圍苑枝春競發臺日晚猶輝語
燕窺吟管飛花坐舞衣二豪同酩酊與爾月中歸

其二

已恨韶華劇能孤爛漫游鶯啼簷樹換蝶戲檻花流賓
客朝開院笙歌晚入樓但看今會者孰與漢枚鄒

酬贈閣老劉公

雷奮龍猶卧雲俱鶴自閒一杯莘野月雙屐謝公山貴
客常辭避田夫數往還桂庭秋偃蹇公醉拉誰攀

其二

大號更嘉靖明公會古稀老驚詩律健閒愛醉游歸庭
戶羅花竹兒孫導綵衣向非干仞覽那見太平輝

其三

壽席秋能半賓庭月故圓前身金粟佛今代玉堂仙
兔巧元供藥龜靈豈算年蠅頭燈下字猶注紫霞編

其四

綠野情真逸香山望獨高酒嫌裴相淺詩掩樂天豪
公實當三老吾虛受二毛人遐室幸邇音惠莫言勞

送田生讀書上方寺

嗜靜甘違俗藏修合就僧綠移開徑竹寒掃護牕藤
殿

閣秋陰下琴書爽氣增不須匡氏壁常有玉蓮燈

其二

寺壓孤城斷堂開積水圍一僧當茗竈羣鷺狎荷衣被
酒時登塔持書晚坐磯鶴騰知客至嗟汝詠而歸

其三

涼雨滿庭戶冷然松桂幽隔雲清磬濕向夜一燈留螢
火輝書幌烏啼上佛樓諒多今古意先著宋春秋

登鐘樓答田秀才

老足秋能健朋游嶽益豪眼當孤閣放身已百層高霜
壁搖朱杞風簷落白蒿生平望東海一釣有連鰲

別鄭生

白首還離別長途倍苦辛憤時惟按劍避世謾垂綸江
海烟霜日乾坤去住身臨河見雙鴈杳杳向秋旻

送白帥留守中都

幕府開淮甸山河繞漢陵曉霜迎旆入王氣及秋澄
弩卧銅牙澁矛拋綠蘚增黃金印如斗應有異時徵

再送白帥

聖主下龍章將軍入鳳陽地盤淮海壯天擁漢陵長檠
戟新開府威名古辟疆卜年元萬世王道是金湯

再送鄭生

間君數日住使我百憂寬池館杯觴易天涯故舊難久
晴冬欲暖近水晚猶寒惜取防身劍慙慙醉裏看

譚劉二子過賞牡丹

載酒來朋遠尋芳出郭遙遇花雙蓋住繫柳一驄驕野

席留香迴晴尊助艷嬌誰言闌百寶吾有玉鸞簫

其二

學舞花將起矜歌鳥自來日筵隨蔭徙風袂入香開李
白昭陽調姚黃洛下杯古今君莫問且促醉輶迴

春日寄題崔學士後渠書屋七首

草閣臨何地花天想後渠傍牆應植柳俯岸幾跳魚好
撰王褒頌休親郭橐書改元新禮制側席待相如

其二

石白雲花瑩湍青水葉香野情鷗鳥足紗帽世塗忘問
字船能過聽鶯客不妨無言渾是暇當有草玄忙

其三

鮑客春還鄴崔渠遂盛傳水溶漳岸日草碧魏城天徑
竹竿竿秀汀花朶朶鮮但無醒酒石物物勝平泉

其四

敞敞渠邊屋輝輝座右銘竹琴晴愈靜蘿燭夜還青洄
水明卿月陳家聚德星泥中雖近戲僕隸解談經

其五

是否龜蒙鴨將無逸少鵝內官聊一戲道士敢頻過自
坐蒲磯飲誰攀桂擢歌絕絃知不易白眼向山河

其六

賦筆多崔瑗朋車媿呂安碧渠何日到雲樹一春看南
果枇杷活西郊苜蓿寬覓君終繫馬艤棹是何灘

其七

且養岷山鳥休焚學士魚窮通不在我水竹漫成居綠

辟深藏屋丹花淺映渠幾時朝聖主人擬治安書

小園花發譚劉二君訂遊涉夏始至

尚有春留賞無言客過遲砌紅殘芍藥園綠半荼蘼邂逅情真倍追隨酒莫辭有懷君盡放得意是佳期

其二

繾綣杯侵夜紆徐月轉庭醉尋松影立涼愛竹風聽老去朋情怨年來世事經玉繩天歷歷誰識少微星

其三

涉夏榴能綻深更客尚遊羣行逢樹問獨立為花留就
月還移席呼兒重洗甌醉眸橫北斗曙角起城頭

送呂廣文四川衡聘

大省文衡重名師禮聘遙閣雲攀暑旆棧月引星輶古
帝蠶叢國今人駟馬橋好將楊馬輩收取貢清朝

贈孟監司赴任三首

孟嘗知汶上縣
有寄我之作

南輟江湖棹東飛海岱旗勇辭知至性強起為名時氣
節聊城箭文章孔廟碑秋風立馬地莫動季鷹思

其二

汶上篇仍在齊東節重過繞臺新柏秀匝縣舊花多海
色搖行憶山雲護詠窩談天君一問稷下近如何

其三

麋鹿游山性蛟龍卧水心得雲終一起食野不孤吟汝
去觀滄海予常慕孔林何時挈尊酒同躡太山岑

送譚子

國謚逾年至王臣觸暑行水花邀去節山鳥勸離觥久

客交人廣攜家念土輕玉筵頌扇日應注使回名

其二

聚賞蜂初課分攜燕已雛泥驚落夏簟花憶倒春壺水
路風旗進晴船暑氣無五雲赤日外縹緲是皇都

贈林監察阻雨郊館

積雨淹征旆曾城隅論文一尊真惜酒萬里正橫雲京
國驄謠屬閩江道派分美名吾實美何處接高芬

庭菊紛披有懷王喻二君子

鴈急秋真晚園空菊自黃
露團翻有色風度不隨香
却憶初開日君來夜把觴
忍今看爛漫獨繞碧籬傍

晚秋王喻二監察見過二首

自種吾堂菊無人共把卮
昨來三徑雨忽與兩驄期
檻霽花逾爽林寒酒故隨
坐忘俱酩酊莫遣白衣知

其二

霜日來驄並晴杯汎菊頻
古今無逆旅天地幾閒身
鴈陣寒從急籬香晚自新
豪吟不知夜圓月在高旻

菊日任君見過

菊筵開遇雨秋色轉增孤冷翠元浮席流香故灑壺
沾卷袖摘徑滑倩人扶莫謂無開霽斜陽酒重沾

寄鄭生

故菊開誰對新醪悵爾違耳憎木葉下心與塞鴻歸
兒女催蓬鬢家園滯綵衣問君稱慶暇何處採山薇

其二

節序仍黃菊乾坤更白頭文章寧益世衣食暫寬憂遇

客誰談劍思君獨倚樓遠江寒細細似有北行舟

空同集卷二十六

欽定四庫全書薈要卷一萬六千九百十八

集部

空同集卷二十七

明 李夢陽 撰

五言律五

月夜繁臺會兩監察

路葉風交落臺驄晚並行時寒物色換意遠世緣輕異
國同觴地危樓片月情暝烟凭檻裏汴水凍猶聲

其二

萬里危樓夜中天朗月時快心真託酒凝望轉停卮野
色霜元迴林光燭並移依依簷畔鵲先占獨棲枝

送李生還郡

宦美庭闈隔情深郡檄催臘江舟自穩暮日首頻回洞
橘黃金摘吳魚白雪來汝親知更樂願展治邦才

其二

伯道吳門水梁公冀北雲依親歲聿暮趨郡袂還分臘
動蘇臺色春回震澤薰重過應未遠良吏漢廷聞

甥嘉北來出其謁逢千廟之作予為和之嘉時

謫茂州判

汝謁雙忠廟徘徊幾度吟
暴雲連海白積水帶城陰
自杖看碑淚誰知駐馬心
未須悲遠竄不死是恩深

送甥嘉之茂州次玉溪侍御韻三首

已詫齊東謫能堪蜀道行
自甘窮塞竄爭奈倚閭情
劒閣雲中棧蓬婆雪外城
大江秋見底待爾濯長纓

其二

蜀道元非易人言此更難虎風生萬壑蛇徑動千盤北
望常思闕西來不為官無言羌性異汝當郡民看

其三

雪山天地外經夏雪難消氣冷三城戍光通萬里橋誰
言州不好汝去路寧遙縱使胡笳夜猶能夢入朝

郊園遲王參使不至

豈少銀鞍馬衝泥許故游清風微進草晴日澹生秋掃
徑童將倦看籠鶴但收異時高李會佳跡至今留

王豸使至復有此賦

晴游翻幸雨午出更便風柳重陶潛宅花霑御史驄
達人元野性濁酒本村翁酌罷桑麻晚歸燈一徑紅

王豸使既返東月皎升乃與李曹二子徑觴吹
臺之巔口占東王子

王歸不待月二子共登臺天地劃然皎山河相盪迴
蟲鳴崖底葉鴈影掌中杯為問山陰客還能棹雪來

秋日呂公西園同王溪侍御二首

園勝城能曲臺高野更秋
席陪驄馬出情為碧雲留
移坐鋪林葉添樽面水流
潛思歌舞地指點問皇州

其二

入院看垂柿臨畦羨引泉
寒萋自滿地疎樹不妨天
野老疑旌旆林鳥下酒筵
無云但游衍公意在桑田

西園酒半會玉溪侍御瓜代報至再賦二首

北使還朝近西城返照深
霜情留果實晚意付花心
風助林臯爽雲橫海嶽陰
茲游如在念應有寄南音

其二

勝地留賓切離筵散酒遲網魚生躍案摘棗脆連枝草
夕鳴蛩動天秋過鴈知河橋明日事願盡掌中卮
見和君病起鬚白輒有所贈亦答其酒過

詫汝鬚添白將無病苦形眼前真過隙身外是浮萍客
到留碁局兒呼檢藥經昔人曾頌酒吾意不如醒

和鄭生行經鳳陽

浩蕩興龍地盤旋踞虎形海吞淮水白天插楚峰青帝

宅精靈聚陵宮虎豹局萬年裡祭禮有道賴朝廷

初冬見雪和鮑生

密雲初布暝疎雨忽成花氣淺冰從薄寒輕白自斜敞
裴誰念汝孤棹獨思家江上冥冥鴈春風遲去槎

鄭生至自泰山

昨汝登東嶽何峰是絕峰有無丈人石幾許大夫松海
日低波鳥巖雷起窟龍誰言天下小化外亦王封

其二

俯首無齊魯東瞻海似杯斗然一峰上不信萬山開日
抱扶桑躍天橫碣石來君看秦始後仍有漢皇臺

寄鮑宗儒

去日猶零雪庭葵遽復花新詩誰和汝久客自成家水
國乾侵夏田風莽帶沙長淮日易暮珍重早棲雅

送趙訓學滿歸

六旬千里客九載一羶歸路遠琴書重官貧妻子饑塞
雲迎老鬢河色戀征衣會有秋行伴關山新鴈飛

其二

宋代陳無已唐時鄭廣文道高官獨冷名美世同間汝
挈一氈去予憐雙袂分潛潛白首淚長向渭西雲

秋過內弟漫賦二首

赫赫采龍地蕭蕭羅雀門桑麻猶世業書史但兒孫數
過看顏帖今來為菊樽顯親君太晚願化北溟鯤

其二

主賓俱不飲相對坐同深幸有黃花興無論白髮心游

蟲紛落日高葉下疎林靜裏聞鴻鴈疑添往歲音

贈陳生

少小期鵬運于今尚未飛
蒿深仲氏宅鶉結憲生衣
背郭元桑樹臨河只釣磯
奉親知不苦饌有白魚肥

其二

白屋山中相黃河水後田家無釀酒
林人索買書錢雨
過雲流野風來浪接天
行行牛角上猶掛古人編

七夕雪臺子過東莊

村落元相接園林亦互游
酒天攜榼就花夜對牀留
忽爾雙星候冷然萬木秋
誰期白頭日蕭灑共丹丘

贈程生東游

鄒魯風猶在芒碭氣有無
羈心空大澤儒行乃長途
野艇冰迷鴈村樓凍集鳥
無勞怨歲暮隨處是江湖

寄題高子君山別業

君山者江陰縣之北山也
高子獲焉於是自稱君
山主人予聞之為作君山詩寄焉

一山背城起萬古號為君秀攬江心月雄吞海面雲金
陵通地脈玉港發人文羨彼投簪客中年卧紫氛

其二

季扎墳邊業春申邑後山一江平展鏡兩港曲成環不
雨雲煙擁長春草木斑隱君梯萬丈倘許世人攀

立春東鄭生問其愁病

天涯春又至游子近如何病久詩難減鄉遙夢易多藥
苗春尚雪舟楫海初波舊業方山下東風徧綠莎

送劉尹赴徵

戀別當炎暑淹留到夕暉
徵書昨日下午循吏古人稀
風樹涼移席庭萱晚就衣
明朝五雲裏爭看兩鳬飛

冬日寺集觀趙帥射

萬里橫霜氣長風快順毛
將軍隻弩發疊中兩鴻號
取石敲新火開鮮弄寶刀
回頭問僧者何處得醇醪

丁亥寒食東養素

細雨穠花候高齋獨坐辰
春風無病物清世有閒人
樹

濕鶯穿穩泥香燕下頻遙思養素者何處卧松筠

喜程生自吳中回致五嶽黃山人音問

爛漫梁園樹江舟爾恰迴苑桃惟舊列牆柳半新栽枝
為來人媚花迎笑口開吳門春更好幾上虎丘臺

其二

黃子吾真畏程生爾更奇江城傾蓋日渭北暮雲時寶
劍神終合冥鴻性不移忽思千里駕慚愧昔人為

伏日載酒尋高司封讀書處

鄭門古城曲小築成幽園為厭朝簪擾魚辭入境喧矮
堂交雜樹炎日駐游軒默默林中意相看對一尊

其二

養寂為園卧尋幽當暑過林深得日薄地靜覺蟬多舊
業元杭稻新亭復薜蘿誰憐朱紱客遽戀白雲窩

懷五嶽山人黃勉之

吳下元多士黃生更妙才心常在五嶽名已動三台系
自汝南出文從西漢來各天難見汝翹首獨徘徊

郊居東竹溪子

當春弄杯醖花落恨紛紛重來日復幾飛葉滿秋雲寒
流下鴈影古戍噪鴉羣殘菊猶堪把長謠獨憶君

聞吳郡黃山人將遊五嶽寄贈

昨報三吳客將尋五嶽遊薜蘿堪製服春水正宜舟二
室雲中峻三花煙外浮住居吾幸邇先肯到嵩丘

其二

天柱峰頭雪蓮花頂上雲朗吟惟李白獨往更黃君婚

嫁今應畢藜藿有幸分共躋恒岱徧歸著五遊文

東莊冬夜別程生自邑

萬里孤村夜疎燈對語心風枝時響牖寒月故明林秦隴新遊壯江湖舊恨侵側知南橐重為有華山吟

己丑八月京口逢五嶽山人

夜雨清池館晨光散石林一舟相過日千里獨來心樹擁江聲斷潮生山氣陰異時懷舊意應比未逢深

京口揚相國園贈五嶽山人

遠客乘秋至名園水竹分林寒翻易雨地靜合偏雲卧
疴思知己逢君愜素聞蕭蕭綠雲裏誰解有論文

經長陵詣黃花鎮

沙嶺羣峰會黃花一徑穿臨崖防馬駭枯木有蛇懸鎖
鑰關門壯星辰陵闕連舊驅悲虜賊得失豈皇天

白洋城

京西太行崦孤壘白洋間已巳曾通賊居庸並立關水
合桑乾渡峰連塞上山聖君敷遠德秋日戰旗閒

至黃花

黃花城壓岑山合，晝多陰坐見五陵。
霧來為九月霖泥，生劒戟澁寒重。
鼓鼙沈寂寞，松林外那傳孤鴈音。

銀山寺

銀山倚鐵壁，天外削三峰。
不見林中寺，來聞午後鐘。
僧徒住石屋，雷雨拔門松。
西望諸陵接，雲成五色龍。

出塞

胡蔓黃河限，秦亡紫塞存。
磧沙浮落日，塞霧宿疎墩。
哨

馬三邊動燒荒千里昏將軍拜金印白骨不曾論

其二

磧石淡無暉胡沙驚自飛望煙尋戍壘聞鴈忽沾衣大
將搜河套遊兵出武威賀蘭山下戰昨日幾人歸

環縣道中

西人習鞍馬而我憚孤征水抱琵琶寨山銜木鉢城裏
瘡新罷戰插羽又徵兵不到窮邊處那知遠戍情

寺

不覩空王宇誰興浩劫心散花疑白象布地果黃金水
霧飛梁灑夕陽迴殿陰獨嗤簪紱客遊賞託雲林

繁臺春望

野曠孤煙靜高臺獨望時地殘隨氏苑天濶禹王祠晚
日雲爭白陰崖花自遲目斷南來鴈蕭然故國思

繁臺別業

地亦因臺峻天能縱屋高宋朝四帝國禹廟九河濤上
下見陵墓風煙含野蒿昔人間醉此簡懶愧吾豪

高遠亭

虛亭蓋樹杪四顧果平蕪
嵩嶽杯前出濁河
牕外紆寺杉時送響塔鸛每來呼
一約朋知飲歸車醉每扶

詣別業

跼蹐豈吾事郊遊惟獨行
風回疑引騎雪落故連城
塔樹凝先白臺雲曳未平
感時侵歲晚白髮暗心驚

中湖寺

龍象何年地千巖一澗迴
我來尋石鏡隔竹望香臺
樹

繞啼猿入人從鳥道來坐殮霞氣晚只擬是天台

其二

陟嶮扣巖扉一鐘鳴翠微丹崖森竹樹雪壁映花飛屋
隙鳴泉寫山昏麋鹿歸松風高壑起雲卧欲沾衣

南湖

中湖果奇絕逾嶺復南湖石磴迴相倚巖泉有乍無開
牕衆壑積當殿一峰孤更覽千林竹因懷長嘯徒

北湖畏雨不至

亂山上雲氣孤客發西岑徒瞻北湖寺其如東路心
猿愁暝雨巖鳥下空陰回首太行麓蕭蕭松橡林

下南湖

湖僧騎牝馬相送石門峰歌仄亂石路日暝漁樵逢
蒼茫翠微裏風落青山鐘羨爾巖居者終期塵外蹤

曉行雲夢澤

曉行雲夢澤雲起失湖村歷歷橫江雨冥冥遠岫昏
鼃鼃當馬吼鷗鷺背人翻欲擬浮湘作吾生異楚魂

劉家隔

匹馬淮山盡孤舟漸楚歌遠商吳蜀雜新雨漢江波驕
燕斜斜下輕鷗片片過整帆遲明發天色定如何

浮漢

杳杳向前城揚船浮漢行水間天上轉色出雨中明已
近鳴鴈月長看龍霧生陳詩歎秣馬風浪獨含情

浮江

浮江晴放舸挂席曉須風日倒明波底天平落鏡中開

牕間赤壁揆桡失吳宮萬古滔滔意潯陽更向東

九江

九江江九流廬嶽負江州世代催前浪圖書羨上游城
孤落日映虎去暮天幽夜笛鄰舟送曲終無限愁

發九江

已發南風盛須時且復停岸沙延繫纜竹色隱回汀行
待江水穩卧看廬阜青此生誰固料湖海一浮萍

豐安莊

地氣南逾熱僧林晚暫栖雲開一江去日在萬山西修
竹涼風至昏鴉古木齊凭高忽灑淚清世有征輦

圓通寺阻雨

巖扉鄰虎穴淹坐面猴江山動雲生眼風迴雨入牕漸
交松際響鶯鬪石間瀧鈴磬煙蘿外高峰只自雙

圓通寺阻雨聞石門碇橋斷水湧阻往東林

石門雨斷橋途阻虎溪遙仄想遠公室秋蓮應盡飄愁
猿吟霧裏落葉重林腰更有天池望巖巖向碧霄

五老峰

東南濤浪吞五老古今存秀色彭湖浴諸峰廬嶽尊中
宵見海日南斗豁天門霜雪顏常靜雲煙解變魂

再至洞院

昔別秋色苦今遊風澗清穿石竹猶活雨過泉自生禮
殿古門換釣臺新路平獨來誰每見雲日此峰情

迴流山亭

亭高山盡入回首見鄱陽天地開吳楚絃歌有宋唐峰

雲低棟白湖日倒碑黃六月吾來此涼風不可當

折桂寺

折桂何朝院開基分翠峰牕明五老雪門掩半崖松泉
瀑飛人過香臺印虎踪千巖誰得到百里但聞鐘

團山登望

石壁朝饒
二山名

團山當縣口石壁對朝饒日靜湖波斂天低島色遙風
雲餘霸氣吳楚混前朝秋水年年落英雄恨不消

芝山望

吳楚分何代乾坤此郡孤江從樹裏斷山入雨中無戰
鬪名空在英雄世與徂酒酣撫長劍極目盡重湖

芝山寺感事

偶到芝山寺遙傷薦福碑雪霜十月動秋戰萬家悲涼
入丹楓墮岨高黃葛垂洪鈞融萬物黔首獨旗旌

龜峰

立壁有天地浮雲無古今仲冬諸客到落日亂峰陰峭
峽通人過危巖把酒唸奇多看不徹昏黑更登臨

泊安仁

官舟商泊同城近月濛濛戍鼓夜長擊漁燈時自紅烏
鵲枝難穩豺狼穴易空向來論大樹心切古人風

鉛山

山水交閩越東南古縣間一峰晴冒雪兩水晝蒸雲石
井鵝湖倚車盤鳥道分儒宮荆棘裏寒葉痛紛紛

市汊夜泊

此夜章江月無端照獨舟人生真梗泛歲暮且帆遊臘

逼寒燈焰波吞霽雪流坐吟風鴈起漁笛滿前洲

豐城夜泊

夏至北風至晚晴涼意增江船逼新月沙色亂疎燈暗
槳故相撥浮陽還自蒸倚檣看劒氣仍見斗間曾

舟往臨江即事

直岼含風細中江放舸安地隨帆席轉風進晚潮殘霞
樹迎牕過晴山卷幔看遙驚雙浴鷺色舉向雲端

雨泊豐城

古岼花層濕陰江鷗半飛波迴撼船重雨側入簾微潭
愛金華湧亭傷寶氣稀二年三歷此腸斷北舟歸

夜行盱江

燈火導山閃旌旗折路頻仙壇杳不見片月故須親土
俗漸異楚人言多雜閩豈無罵不足訟簡愛吾民

赴新喻

露樹且烏啼孤舟晨向西蕭灘千百轉昏暮到羅溪古
驛屯雲密平沙沒日低揚帆更前去月夜不須迷

自進賢趨撫州

炎域霜何厲寒原木欲稀肩輿隨落葉晨日上征衣路
勢東南轉北風鴻鴈歸東鄉新血戰巢破鳥猶飛

雲山渡

渡古雲山積江明日色饒霜融水更落野靜路堪遙冠
蓋行相望干戈氣未消傷心弄兵者汝業本漁樵

玉峽驛夜泊

暑泊無風夜江船深自涼雲纖沾葛細月湧去波長古

峽街孤驛名山引玉梁前途堪躍馬旦發問仙鄉

白沙驛

沙古幽幽白江新泯泯清水街村作國山繞驛為城萬
里將南徼孤槎且暮征壯心與落日的的向波明

澗富嶺赴安福

三月赴安城遙攀嶺路行前驅真避虎絕壁亦啼鶯周
覽物色換極高雲氣迎俯看南贛路孤舸會將征

其二

山行忽百里步步山情新
蘿擁千盤透花齊萬谷春
寒暄不異地憂喜暫隨人
默誦垂堂戒私嗟名利身

鬱孤臺

朔日送客返慨然登鬱孤
悲歌為閩廣指顧盡江湖
南俗羌夷雜北流章貢俱
兵舸尚滿眼繹繹詣饒都

曉至鄔子驛

湖夜乘風過天明見驛樓
數家依獨樹落月隱春洲
日抱越峰上江奔吳徼流
姚源東水外兵甲氣還浮

再至玉虛觀

龍沙欣自昔久泊遂今期雨露新松大丹青舊殿移岸
雲通繡拱江日抱金池欲倚門東閣愁看日暮時

仙樓

仙樓忽欲暝鐘鼓下江煙獨坐一燭秉當門新月懸石
寒壇近斗沙靜樹浮天半夜朝羣帝珊珊羽節還

與駱子遊三山陂三首

庫部平生友湖山百代心追思宮闕地蕪沒水雲深連

馬穿蘆入羣鷗坐石吟誰能堪落日莽莽古城陰

其二

丘壑胸應滿乾坤眼獨真揚鞭指河洛立馬說周秦古
墓笙歌地前朝戰伐塵秋風颭颭起白草正愁人

其三

日扇逢林却風旗改路迴悲涼元此嶽攀陟復何臺雲
破遠峰出天秋孤鴈來明朝異南北歸騎莫教催

上方寺鐘樓

臺上一鐘鳴登臺萬里平
薰葭天正遠雲氣暮還生
饑雀喧空澤黃蒿斷古城
不堪臨眺屢況是感秋情

其二

危閣秋登霽寒煙晚坐重
長風欲動地落日故銜峰
葦颭騰雙鷺雲拖挂一龍
此懷吾不淺怪爾暮鳴鐘

金山

狂瀾日東倒此嶼忽中流
蜃學樓臺結龍專瀕洞遊
光涵天上下影變地沈浮
解識超三象何須問十洲


其二

歷險仍攀閣窮高更指臺一身銀漢上四望鏡波開吳
楚地形伏江淮秋氣來暮潮益滾滾風葉下崔嵬

其三

竒立江心古人遊秋舸新魚龍狎不浪草木潤長春忘
險卑崇構貪竒健病身無為孤柱恐焦島接嶙峋

空同集卷二十七



總校官庶吉士臣侍朝

校對官編修臣閔惇大

謄錄監生臣吳錫綵